



Keperluan kejuruteraan teknologi penuhi kehendak industri

Universiti Malaysia Pahang (UMP) melalui Fakulti Teknologi telah menganjurkan Majlis Syarahan Umum Teknologi Kejuruteraan 2013 di Hotel Royale Bintang Kuala Lumpur pada 15 Mei 2013 yang lalu.

Program ini merupakan medan perkongsian kepakaran dan pencerahan kepada masyarakat dalam membincangkan keperluan bidang kejuruteraan teknologi dalam memenuhi keperluan industri masa depan.

Syarahan kali ini menampilkan Profesor Dr. Promod Vohra yang merupakan Dekan Kolej Kejuruteraan dan Kejuruteraan Teknologi dari Northern Illinois University (NIU) di Amerika Syarikat dengan menyampaikan syarahan bertajuk *“Engineering Technology in a Global World: Opportunities and Challenges”*.

Beliau yang mempunyai pengalaman cukup luas dalam kejuruteraan industri dan kejuruteraan elektrik terutamanya dalam bidang sistem digital, reka bentuk kemahiran, latihan industri, teknologi baharu dan aplikasi teknologi mengikut keperluan industri.

Beliau pernah berkhidmat dalam industri selama lima tahun sebelum berkecimpung dalam bidang akademia.

Naib Canselor UMP, Profesor Dato’ Dr. Daing Nasir Ibrahim berkata, siri syarahan kali ini diadakan bersempena lawatan rasmi pihak NIU ke UMP bagi melaksanakan

beberapa siri lawatan dan perbincangan berkaitan tiga program Ijazah Sarjana Muda Teknologi Kejuruteraan (Engineering Technology) melibatkan Kejuruteraan Teknologi (Elektrikal), Kejuruteraan Teknologi (Tenaga dan Persekitaran) dan Teknologi Kejuruteraan (Pembuatan).

“Program ini adalah rentetan daripada kerjasama yang terjalin antara UMP dan NIU. Antara perbincangan melibatkan pemurnian struktur kurikulum program Teknologi Kejuruteraan dan perbincangan pemindahan kurikulum dari NIU ke UMP,” katanya selepas syarahan umum.

Tambah beliau, hasil perbincangan dengan industri menunjukkan keperluan yang semakin meningkat bagi jurutera untuk memahami realiti dan pelbagai elemen bagi memenuhi keperluan industri negara.

Majlis turut dihadiri Timbalan Naib Canselor (Akademik & Antarabangsa), Profesor Dato’ Ir. Dr. Badhrulhisham Abdul Aziz, Dekan Fakulti Teknologi, Profesor Madya Dr. Abdullah Ibrahim, Dekan Fakulti Kejuruteraan Pembuatan, Profesor Madya Dr. Wan Azhar Wan Yusoff dan Pengarah Bahagian Jaringan Industri & Masyarakat (BJIM), Profesor Dr. Zulkefli Ya’akob.

Hampir 200 peserta dalam kalangan industri dan agensi berkaitan elektrik, pembuatan dan tenaga hadir dalam majlis anjuran Fakulti Teknologi (FTeK) UMP ini.

